

摘藻堂四庫全書薈要

史部

欽定四庫全書叢要

史部

唐書卷四十七
八

詳校官編修臣王天祿



欽定四庫全書蒼要卷五千一百七十九

史部

唐書卷四十七

宋翰林學士歐陽修撰

第三十七

百官志

門下省侍中二人正二品掌出納帝命相禮儀凡國家之務與中書令參總而顓判省事下之通上其制有六一曰奏鈔以支度國用授六品以下官斷流以下罪及

除免官用之二曰奏彈三曰露布四曰議五曰表六曰

狀自露布以上乃審其餘覆奏畫制可而授尚書省行

幸則負寶以從版奏中嚴外辦還宮則請降輅解嚴皇

帝齋則請就齋室將奠則奉玉幣盥則奉匱取盥酌壘

水贊洗酌泛齊受虛爵進福酒皆左右其儀饗宗廟進

瓚而贊酌鬱酒既裸贊酌醴齊籍田則奉耒四夷朝見

則承詔勞問臨軒命使冊皇后皇太子則承詔降宣命

慰問聘召則涖封題發驛遣使則給魚符凡官爵廢置

刑政損益授之史官既書復泣其記注職事官六品以

下進擬則審其稱否而進退之

武德元年改侍內曰納言三年曰侍中龍朔二

年改門下省曰東臺侍中曰左相武后光宅元年曰納言光宅元年改門下省曰鸞臺開元元年曰黃門省侍

中曰監天寶元年曰左相

門下侍郎二人正三品掌貳侍中之職大祭祀則從盥

則奉巾既悅奠中奉匏爵贊獻元日冬至奏天下祥瑞

侍中闕則泣封符券給傳驛

龍朔二年改黃門侍郎曰東臺侍郎武后光宅元年

曰鸞臺侍郎天寶元年曰門下侍郎乾元元年曰黃門侍郎大歷二年復舊

左散騎常侍二人正三品下掌規諷過失侍從顧問

隋廢

散騎常侍貞觀元年復置十七年為職事官顯慶二年分左右隸門下中書省皆金蟬珥貂左散騎與侍中為

左貂右散騎與中書令為右貂謂之八貂龍朔二年曰侍極

左諫議大夫四人正四品下掌諫諭得失侍從贊相武
后垂拱二年有魚保宗者上書請置匭以受四方之書
乃鑄銅匭四塗以方色列於朝堂青匭曰延恩在東告
養人勸農之事者投之丹匭曰招諫在南論時政得失
者投之白匭曰伸冤在西陳抑屈者投之黑匭曰通玄

在北告天文祕謀者投之以諫議大夫補闕拾遺一人
充使知匭事御史中丞侍御史一人為理匭使其後同
為一匭天寶九載玄宗以匭聲近鬼改理匭使為獻納
使至德元年復舊寶應元年命中書門下擇正直清白
官一人知匭以給事中中書舍人為理匭使建中二年
以御史中丞為理匭使諫議大夫一人為知匭使投匭
者使先驗副本開成三年知匭使李中敏以為非所以
廣聰明而慮幽枉也乃奏罷驗副封

武德元年置諫議大夫龍朔二年曰

正諫大夫貞元
四年分左右

給事中四人正五品上掌侍左右分判省事察弘文館
繕寫讎校之課凡百司奏抄侍中既審則駁正違失詔
勅不便者塗竄而奏還謂之塗歸季終奏駁正之目凡
大事覆奏小事署而頒之三司詳決失中則裁其輕重
發驛遣使則與侍郎審其事宜六品以下奏擬則校功
狀殿最行藝非其人則白侍中而更焉與御史中書舍
人聽天下寃滯而申理之門下省有錄事四人從七品

上主事四人從八品下

有令史二十二二人書令史四十三人甲庫令史十三人能書一

人傳制二人亭長六人掌固十四人修補制勅匠五人
裝潢一人起居郎領令史三人贊者六人武德三年改

給事郎曰
給事中

左補闕六人從七品上左拾遺六人從八品上掌供奉

諷諫大事廷議小則上封事

武后垂拱元年置補闕拾遺左右各二員

起居郎二人從六品上掌錄天子起居法度天子御正

殿則郎居左舍人居右有命俯陛以聽退而書之季終

以授史官貞觀初以給事中諫議大夫兼知起居注或

知起居事每仗下議政事起居郎一人執筆記錄於前

史官隨之其後復置起居舍人分侍左右秉筆隨宰相

入殿若仗在紫宸內閣則夾香案分立殿下直第二螭

首和墨濡筆皆即均處時號螭頭高宗臨朝不決事有

所奏唯辭見而已許敬宗李義府為相奏請多畏人之

知也命起居郎舍人對仗承旨仗下與百官皆出不復

聞機務矣長壽中宰相姚璩建議仗下後宰相一人錄

軍國政要為時政紀月送史館然率推美讓善事非其

實未幾亦罷而起居郎猶因制勅稍稍筆削以廣國史
之闕起居舍人本記言之職唯編詔書不及它事開元
初復詔修史官非供奉者皆隨仗而入位於起居郎舍
人之次及李林甫專權又廢太和九年詔入閣日起居

郎舍人具紙筆立螭頭下復貞觀故事

有令史三人贊者六人貞觀三

年置起居郎廢舍人龍朔二
年曰左史天授元年亦如之

典儀二人從九品下掌贊唱及殿中版位之次侍中版

奏中嚴外辦亦贊焉

隋謁者臺有典儀武德
五年復置隸門下省

城門郎四人從六品上掌京城皇城宮殿諸門開闔之

節奉管鑰而出納之開則先外後內闔則先內後外啓

閉有時不以時則詣閣覆奏

有令史二人書令史二人武德五年置門僕八百人

番上送
管鑰

符寶郎四人從六品上掌天子八寶及國之符節有事則請於內既事則奉而藏之大朝會則奉寶進於御座行幸則奉以從焉大事出符則藏其左而班其右以合中外之契兼以勅書小事則降符函封使合而行之凡

命將遣使皆請旌節旌以顯賞節以顯殺

有令史二人書令史三人

主寶二人主符四人主節四人武后延載元年改符璽郎曰符寶郎開元元年亦曰符寶郎

弘文館學士掌詳正圖籍教授生徒朝廷制度沿革禮

儀輕重皆參議焉

武德四年置修文館於門下省九年改曰弘文館貞觀元年詔京官職事

五品已上子嗜書者二十四人隸館習書出禁中書法以授之其後又置講經博士儀鳳中置詳正學士校理

圖籍武德後五品以上曰學士六品以上曰直學士又有文學直館皆它官領之武后垂拱後以宰相兼領館

務號館主給事中一人判館事神龍元年改弘文館曰昭文館以避孝敬皇帝之名二年曰修文館景龍二年

置大學士四人以象四時學士八人以象八節直學士十二人以象十二時景雲中減其員數復為昭文館開

元七年曰弘文館置校書郎又有校理讎校錯誤等官
長慶三年與詳正學士講經博士皆罷顯以五品以上
曰學士六品以下曰直
學士未登朝為直館

校書郎二人從九品上掌校理典籍刊正錯謬凡學生

教授考試如國子之制

有學生三十八人令史二人楷
書十二人供進筆二人典書二

人榻書手三人筆匠三人熟紙裝
潢匠八人亭長二人掌固四人

中書省中書令二人正二品掌佐天子執大政而總判

省事凡王言之制有七一曰冊書立皇后皇太子封諸

王臨軒冊命則用之二曰制書大賞罰赦宥慮囚大除

授則用之三曰慰勞制書褒勉贊勞則用之四曰發勅
廢置州縣增減官吏發兵除免官爵授六品以上官則
用之五曰勅旨百官奏請施行則用之六曰論事勅書
戒約臣下則用之七曰勅牒隨事承制不易於舊則用
之皆宣署申覆然後行焉大祭祀則相禮親征募嚴則
戒飭百官臨軒冊命則讀冊若命於朝則宣授而已冊
太子則授璽綬凡制詔文章獻納以授記事之官

武德三年

改內書省曰中書省內書令曰中書令龍朔元年改中書省曰西臺中書令曰右相光宅元年改中書省曰鳳

閣中書令曰內史開元元年改中書省曰紫微省中書令曰紫微令天寶元年曰右相至大厯五年紫微侍郎乃復為中書侍郎

侍郎二人正三品掌貳令之職朝廷大政參議焉臨軒册命為使則持册書授之四夷來朝則受其表疏而奏之獻贄幣則受以付有司

舍人六人正五品上掌侍進奏參議表章凡詔旨制勅璽書册命皆起草進畫既下則署行其禁有四一曰漏洩二曰稽緩三曰違失四曰忘誤制勅既行有誤則奏

改之大朝會諸方起居則受其表狀大捷祥瑞百寮表
賀亦如之冊命大臣則使持節讀冊命將帥有功及大
賓客則勞問與給事中及御史三司鞫寃滯百司奏議
考課皆預裁焉以久次者一人為閣老判本省雜事又
一人知制誥顯進畫給食於政事堂其餘分署制勅以
六員分押尚書六曹佐宰相判案同署乃奏唯樞密遷
授不預姚崇為紫微令奏大事舍人為商量狀與本狀
皆下紫微令判二狀之是否然後乃奏開元初以它官

掌詔勅策命謂之兼知制誥肅宗即位又以它官知中

書舍人事兵興急於權便政去臺閣決遣顯出宰相自

是舍人不復押六曹之奏會昌末宰相李德裕建議臺

閣常務州縣奏請復以舍人平處可否先是知制誥率

用前行正郎宣宗時選尚書郎為之主書四人從七品

上主事四人從八品下

有令史二十三人書令史五十人
能書四人蕃書譯語十人乘

驛二十人傳制十人亭長十八人掌固二十四人裝制
勅匠一人修補制勅匠五十人掌函掌案各二十人

右散騎常侍二人右諫議大夫四人右補闕六人右拾

遺六人掌如門下省

起居舍人二人從六品上掌修記言之史錄制誥德音

如記事之制季終以授國史

有楷書手四人典二人

通事舍人十六人從六品上掌朝見引納殿庭通奏凡

近臣入侍文武就列則導其進退而贊其拜起出入之

節蠻夷納貢皆受而進之軍出則受命勞遣既行則每

月存問將士之家視其疾苦凱還則郊迓

有令史十人典謁十人亭

長十八人掌固二十四人武德四年廢謁者臺改通事謁者曰通事舍人

集賢殿書院學士直學士侍讀學士修撰官掌刊緝經籍凡圖書遺逸賢才隱滯則承旨以求之謀慮可施於時著述可行於世者考其學術以聞凡承旨撰集文章校理經籍月終則進課於內歲終則考最於外

開元五年乾元

殿寫四部書置乾元院使有判正官四人以一人判事押院中使一人掌出入宣奏領中官監守院門知書官八人分掌四庫書六年乾元院更號麗正修書院置使及檢校官改修書官為麗正殿直學士八年加文學直又加修撰校理判正校勘官十一年置麗正院修書學士光順門外亦置書院十二年東都明福門外亦置麗正書院十三年改麗正修書院為集賢殿書院五品以上為學士六品以下為直學士宰相一人為學士知院

事常侍一人為副知院事又置判院一人押院中使一人玄宗嘗選耆儒日一人侍讀以質史籍疑義至是置集賢院侍講學士侍讀直學士其後又增修撰官校理官待制官留院官知檢討官文學直之員募能書者為書直及寫御書人其後亦以前資常選三衛散官五品以上子孫為之又置畫直至十九年以書直畫直榻書有官者為直院至德二年置大學士貞元初置編錄官四年罷大學士八年罷校理置校書四人正字二人元和二年復置集賢校理罷校書正字四年集賢御書院學士直學士皆用五品如開元故事以學士一人年高者判院事非登朝官者為校理餘皆罷初太宗即位命京官五品以上更宿中書門下兩省以備訪問永徽中命弘文館學士一人日待制於武德殿西門文明元年詔京官五品以上清官日一人待制於章善明福門先天未又命朝集使六品以上二人隨仗待制永泰時勳臣罷節制無職事皆待制於集賢門凡十三人崔祐甫

為相建議文官一品以上更直待制其後著令正衙待制官日二人

校書四人正九品下正字二人從九品上

有中使一人孔目官一人

專知御書檢討八人知書官八人書直寫御書手九十人畫直六人裝書直十四人造筆直四人榻書六人典人四

史館修撰四人掌修國史

貞觀三年置史館於門下省以它官兼領或卑位有才者

亦以直館稱以宰相涖修撰又於中書省置祕書內省修五代史開元二十年李林甫以宰相監修國史建議以為中書切密之地史官記事隸門下省疏遠於是諫議大夫史館修撰尹愔奏徙於中書省天寶後它官兼史職者曰史館修撰初入為直館元和六年宰相裴瑒建議登朝官領史職者為修撰以官高一人判館事未

登朝官皆為直館大中八年廢史館直館二員增修撰
四人分掌四季有令史二人楷書十二人寫國史楷書
十八人楷書手二十五人典書二人
亭長二人掌固四人熟紙匠六人

祕書省監一人從三品少監二人從四品上丞一人從

五品上監掌經籍圖書之事領著作局少監為之貳武德

四年改少令曰少監龍朔二年改祕書省曰蘭臺監曰
太史少監曰侍郎丞曰大夫祕書郎曰蘭臺郎武后垂
拱元年祕書省曰麟臺太極元年曰祕書省有典書四
人楷書十人令史四人書令史九人亭長六人掌固八
人熟紙匠十人裝潢
匠十人筆匠六人

祕書郎三人從六品上掌四部圖籍以甲乙丙丁為部

皆有三本一曰正二曰副三曰貯凡課寫功程皆分判
校書郎十人正九品上正字四人正九品下掌讎校典
籍刊正文章

著作局郎二人從五品上著作佐郎二人從六品上校
書郎二人正九品上正字二人正九品下著作郎掌撰
碑誌祝文祭文與佐郎分判局事

武德四年改著作曹
曰局龍朔元年曰司

文局郎曰郎中佐郎曰司文郎有楷書
五人書令史一人書吏二人掌固四人

司天臺監一人正三品少監二人正四品上丞一人正

六品上主簿二人正七品上主事一人正八品下監掌

察天文稽歷數凡日月星辰風雲氣色之異率其屬而

占有通玄院以藝學召至京師者居之凡天文圖書器

物非其任不得與焉每季錄祥青送門下中書省紀於

起居注歲終上送史館歲頒歷於天下

武德四年改太史監曰太史局

隸祕書省七年廢監候龍朔二年改太史局曰祕書閣

局令曰祕書閣郎中武后光宅元年改太史局曰渾天

監不隸麟臺俄改曰渾儀監置副監及丞主簿改司辰

師曰司辰長安二年渾儀監復曰太史局廢副監及丞

隸麟臺如故改天文博士曰靈臺郎歷博士曰保章正

景龍二年改太史局曰太史監不隸祕書省復置丞景

雲元年又為局隸秘書省踰月為監歲終復為局二年改曰渾儀監開元二年復曰太史監改令為監置少監

十四年太史監復為局以監為令而廢少監天寶元年太史局復為監自是不隸秘書省乾元元年曰司天臺

藝術人韓穎劉恒建議改令為監置通玄院及主簿置五官監候及五官禮生十五人掌布諸壇神位五官楷

書手五人掌寫御書有令史五人天文觀生九十人天文生五十人歷生五十五人初有天文博士二人正八

品下歷博士一人從八品上司辰師五人正九品下裝書歷生掌候天文掌教習天文氣色掌寫御歷後皆省

春官夏官秋官冬官中官正各一人正五品上副正各

一人正六品上掌司四時各司其方之變異冠加一星

珠以應五緯衣從其方色元日冬至朔望朝會及大禮

各奏方事而服以朝見

乾元三年置五官正及副正

五官保章正二人從七品上五官監候三人正八品下
五官司歷二人從八品上掌歷法及測景分至表準

五官靈臺郎各一人正七品下掌候天文之變五官挈
壺正二人正八品上五官司辰八人正九品上漏刻博
士六人從九品下掌知漏刻凡孔壺為漏浮箭為刻以

考中星昏明更以擊鼓為節點以擊鐘為節

武后長安二年置挈

壺正乾元元年與靈臺郎保章正司歷司辰皆加五官
之名有漏刻生四十人與鐘典鼓三百五十人初有刻

漏視品刻漏典事掌知
刻漏檢校刻漏後皆省

殿中省監一人從三品少監二人從四品上丞二人從
五品上監掌天子服御之事其屬有六局曰尚食尚藥
尚衣尚乘尚舍尚輦少監為之貳凡聽朝率屬執繖扇
列於左右大朝會祭祀則進爵行幸則侍奉仗內驂乘
百司皆納印而藏之大事聽焉有行從百司之印左右
仗殿左曰奔星右曰內駒兩仗內又有六殿一曰左飛
二曰右飛三曰左萬四曰右萬五曰東南內六曰西南

內園苑有官馬坊每歲河隴羣牧進其良者以供御六
閑馬以殿中監及尚乘主之武后萬歲通天元年置仗
內六閑一曰飛龍二曰祥麟三曰鳳苑四曰鷓鴣五曰
吉良六曰六羣亦號六殿以殿中丞檢校仗內閑殿以
中官為內飛龍使聖歷中置閑殿使以殿中監承恩遇
者為之分領殿中太僕之事而專掌輿輦牛馬自是宴
游供奉殿中監皆不豫開元初閑殿馬至萬餘匹駱駝
巨象皆養焉以駝馬隸閑殿而尚乘局名存而已閑殿

使押五坊以供時狩一曰鷩坊二曰鷮坊三曰鷦坊四

曰鷹坊五曰狗坊侍御尚醫二人正六品上主事二人

從九品上

武德元年改殿內監曰殿中省龍朔二年曰中御府監曰大監丞曰大夫有令史四人書

令史十二人左右仗千牛各十人掌固亭長各八人舊有天藏府開元二十二年省

進馬五人正七品上掌大陳設戎服執鞭居立仗馬之

左視馬進退

天寶八載罷南衙立仗馬因省進馬十二載復置乾元後又省大曆十四年復

尚食局奉御二人正五品下直長五人正七品上諸奉

御直長品皆如之食醫八人正九品下奉御掌儲供直

長為之貳進御必辨時禁先嘗之饗百官賓客則與光

祿視品秩而供凡諸陵月享視膳乃獻

龍朔二年改尚食局曰奉膳局

諸局奉御皆曰大夫有書令史二人書吏五人主食十六人主膳八百四十人掌固八人

尚藥局奉御二人直長二人掌和御藥診視凡藥供御

中書門下長官及諸衛上將軍各一人與監奉御涖之

藥成醫佐以上先嘗疏本方具歲月日涖者署奏餌日

奉御先嘗殿中監次之皇太子又次之然後進御太常

每季閱送上藥而還其朽腐者左右羽林軍給藥飛騎

萬騎病者頒焉

龍朔二年改尚藥局曰奉醫局有按摩師四人呪禁師四人書令史二人書吏

四人直官十人主藥十二人藥童三十人合口脂匠一人掌固四人

侍御醫四人從六品上掌供奉診候

司醫五人正八品下醫佐十人正九品下掌分療衆疾

皆貞觀中置

尚衣局奉御二人直長四人掌供冕服几案祭祀則奉鎮圭於監而進於天子大朝會設案

龍朔二年改尚衣局曰奉冕局有書

令史三人書吏四人主衣十六人掌固四人

尚舍局奉御二人直長六人掌殿庭祭祀張設湯沐燈
燭汛掃行幸則設三部帳幕有古帳大帳次帳小次帳
小帳凡五等各三部其外則蔽以排城大朝會設黼宸
施躡席薰鑪朔望設幄而已

龍朔二年改尚舍局曰奉
宸局有書令史三人書吏

七人掌固十人幕士八十人舊有給使百
二十人掌供御湯沐燈燭雜使貞觀中省

尚乘局奉御二人直長十人掌內外閑廐之馬左右六
閑一曰飛黃二曰吉良三曰龍媒四曰駒駉五曰馱馱
六曰天苑凡外牧歲進良馬印以三花飛鳳之字飛龍

殿日以八馬列宮門之外號南衙立仗馬仗下乃退大

陳設則居樂縣之北與象相次

龍朔二年改尚乘局曰奉駕局有書令史六人

書吏十四人直官二十人習馭五百人掌閑五千人典

事五人獸醫七十人掌固四人習馭掌調六閑之馬掌

閑掌飼六閑之馬治其乘具鞍轡典事掌六

閑芻粟太宗置司廩司庫高宗置習馭獸醫

司廩司庫各一人正九品下掌六閑藁秸出納奉乘十

八人正九品下掌飼習御馬

尚輦局奉御二人直長三人尚輦二人正九品下掌輿

輦織扇大朝會則陳於庭大祭祀則陳於廟皆織二翰

一扇一百五十有六既事而歲之常朝則去扇左右留

者三

龍朔二年改尚輦局曰奉舉局有書令史二人書吏四人七輦主輦各六人掌扇六十人掌翰三十

人掌輦四十二人奉舉十五人掌固六人掌扇掌翰掌執繳扇紙筆硯雜供奉之事掌輦掌率主輦以供其事

高宗置

掌翰

內侍省監二人從三品少監二人內侍四人皆從四品

上監掌內侍奉宣制令其屬六局曰掖庭宮闈奚官內

僕內府內坊少監內侍為之貳皇后親蠶則升壇執儀

大駕出入為夾引

武德四年改長秋監曰內侍監內丞奉曰內常侍內承直曰內給事龍朔

二年改監為省武后垂拱元年曰司宮臺天寶十三年
置內侍監改內侍曰少監尋更置內侍有高品一千六
百九十六人品官白身二千九百三
十二人令史八人書令史十六人

內常侍六人正五品下通判省事

內給事十人從五品下掌承旨勞問分判省事凡元日
冬至百官賀皇后則出入宣傳宮人衣服費用則具品
秩計其多少春秋宣送於中書主事二人從九品下

內謁者監六人正六品下掌儀法宣奏承勅令及外命
婦名帳凡諸親命婦朝會者籍其數上內侍省命婦下

車則導至朝堂奏聞

唐廢內謁者局置內典引十八人掌諸親命婦朝參出入導引有內

亭長六人
掌固八人

內謁者十二人從八品下掌諸親命婦朝集班位分注
諸門

內寺伯六人正七品下掌糾察宮內不法歲饑則菴出
入

寺人六人從七品下掌皇后出入執御刀冗從

掖庭局令二人從七品下丞三人從八品下掌宮人簿

帳女工凡宮人名籍司其除附公桑養蠶會其課業供奉物皆取焉婦人以罪配沒工縫巧者隸之無技能者隸司農諸司營作須女工者取於戶婢

有書令史四人書吏八人計史

二人典事十人掌固四人計史掌料工程

宮教博士二人從九品下掌教習宮人書算衆藝

初內文學

館隸中書省以儒學者一人為學士掌教宮人武后如意元年改曰習藝館又改曰萬林內教坊尋復舊有內教博士十八人經學五人史子集綴文三人楷書二人莊老太一家書律令吟詠飛白書并碁各一人開元末館廢以內教博士以下隸內侍省中官為之

監作四人從九品下掌監涖雜作典工役

宮闈局令二人從七品下丞二人從八品下掌侍宮闈

出入管籥凡享太廟皇后神主出入則帥其屬輿之總

小給使學生之籍給以糧稟

有書令史三人書吏六人內闈史二十人內掌扇十

六人內給使無常員小給使學生五十人掌固四人凡無官品者號曰內給使掌諸門進物之厯內闈史掌承

傳諸門出納管籥內

掌扇掌中宮織扇

奚官局令二人正八品下丞二人正九品下掌奚隸工

役宮官之品官人病則供醫藥死給衣服各視其品陪

陵而葬者將作給匠戶衛士營冢三品葬給百人四品八十人五品六十人六品七品十人八品九品七人無品者斂以松棺五釘葬以犢車給三人皆監門校尉直長涖之內命婦五品以上無親戚者以近冢同姓中男一人主祭於墓無同姓者春秋祠以少牢

有書令史三人書吏六人

典事藥直掌固各四人

內僕局令三人正八品下丞二人正九品下掌中宮車乘皇后出則令居左丞居右夾引

有書令史二人書吏四人駕士百四十人

典事八人掌固八人駕
士掌習御車輿雜畜

內府局令二人正八品下丞二人正九品下掌中藏寶

貨給納之數及供燈燭湯沐張設凡朝會五品已上及

有功將士蕃酋辭還皆賜於庭

有書令史二人書史典
史掌固各四人典事六

人

太子內坊局令二人從五品下丞二人從七品下掌東

宮閣內及宮人糧稟坊事五人從八品下

初內坊隸東
宮開元二十

七年隸內侍省為局改典內曰令置丞坊事及導客舍
人六人掌序導賓客閣帥六人掌帥閣人內給使以供

其事內閣人八人掌承諸門出入管籥內繖扇燈燭內
殿尉二人掌車乘有錄事一人令史三人書令史五人
典事二人駕士三十人亭長掌固各二人

典直四人正九品下掌宮內儀式導引通傳勞問糾劾
非違察出納

內官貴妃惠妃麗妃華妃各一人正一品掌佐皇后論

婦禮於內無所不統

唐因隋制有貴妃淑妃德妃賢妃各一人為夫人正一品昭儀昭容

昭媛修儀修容修媛充儀充容充媛各一人為九嬪正二品婕妤九人正三品美人四人正四品才人五人正

五品寶林二十七人正六品御女二十七人正七品采女二十七人正八品六尚亦曰諸尚書正三品二十四

司亦曰諸司事正四品二十四典亦曰諸典事正六品
二十四掌亦曰諸掌事龍朔二年置贊德二人正一品
宣儀四人正二品承閨五人正四品承旨五人正五品
衛士六人正六品供奉八人正七品侍櫛二十人正八
品侍巾三十人正九品咸亨復舊開元中玄宗以后妃
四星一為后有后而復置四妃非典法乃置惠妃麗妃
華妃以代三夫人又置六儀美人才人增尚宮尚儀尚
服三局諸司諸典自六品至九品而止其後復置貴妃
淑儀德儀賢儀順儀婉儀芳儀各一人正二品掌教九
御四德率其屬以贊后禮

美人四人正三品掌率女官修祭祀賓客之事

才人七人正四品掌叙燕寢理絲枲以獻歲功

宮官尚宮局尚宮二人正五品六尚皆如之掌導引中

宮總司記司言司簿司閹凡六尚事物出納文籍皆涖

其印署

有女史六人
掌執文書

司記二人正六品二十四司皆如之掌宮內文簿入出

錄為抄目審付行馬牒狀無違然後加印典記佐之

典記二人正七品二十四典皆如之

掌記二人正八品二十四掌皆如之

司言典言各二人掌承勅宣付別鈔以授司閹傳外

掌言二人掌宣傳外司附奏受事者奏聞承勅處分則
錄所奏為案記有女史四人

司簿典簿掌簿各二人掌女史以上名簿稟賜則品別

條錄為等有女史六人

司闈六人掌諸閣管鑰

典闈掌闈各六人掌分注啓閉有女史四人

尚儀局尚儀二人掌禮儀起居總司籍司樂司賓司贊

司籍典籍掌籍各二人掌供御經籍分四部部別為目

以時暴涼教學則簿記課業供奉几案紙筆皆預侍焉

有女史

十人

司樂典樂掌樂各四人掌宮縣及諸樂陳布之儀涖其

閱習

有女史
二人

司賓典賓掌賓各二人掌賓客朝見受名以聞宴會則

具品數以授尚食有賜物與尚功涖給

有女史
二人

司贊典贊掌贊各二人掌賓客朝見宴食贊相導引會

日引客立於殿庭司言宣勅坐然後引即席酒至起再

拜食至亦起皆相其儀

彤史二人正六品

有女史二人

尚服局尚服二人掌供服用采章之數總司寶司衣司飾司仗

司寶二人掌神寶受命寶六寶及符契皆識其行用記以文簿

典寶掌寶各二人凡出付皆旬別案記還則朱書注入

有女史四人

司衣典衣掌衣各二人掌宮內御服首飾整比以時進

奉

有女史
四人

司飾典飾掌飾各二人掌湯沐巾櫛凡供進識其寒溫

之節

有女史
二人

司仗典仗掌仗各二人掌仗衛之器凡立儀衛尚服率

司仗等供其事

有女史
二人

尚食局尚食二人掌供膳羞品齊總司膳司醞司藥司

饍凡進食先嘗

司膳二人掌烹煎及膳羞米麩薪炭凡供奉口味皆種別封印

典膳掌膳各四人掌調和御食溫涼寒熱以時供進則

嘗之

有女史四人

司醞典醞掌醞各二人掌酒醴酏飲以時進御

有女史二人

司藥典藥掌藥各二人掌醫方凡藥外進者簿案種別

有女史二人

司饎典饎掌饎各二人掌給宮人餼食薪炭皆有等級

受付則旬別案記

有女史四人

尚寢局尚寢二人掌燕見進御之次敘總司設司輿司苑司燈

司設典設掌設各二人掌牀帷茵席鋪設久故者以狀聞凡汛掃之事典設以下分視

有女史四人

司輿典輿掌輿各二人掌輿輦輦扇文物羽旄以時暴涼典輿以下分察

有女史二人

司苑典苑掌苑各二人掌園苑蒔植蔬果典苑以下分

察之果熟進御

有女史二人

司燈典燈掌燈各二人掌門閭燈燭晝漏盡一刻典燈

以下分察

有女史二人

尚功局尚功二人掌女功之程總司製司珍司綵司計

司製典製掌製各二人掌供御衣服裁縫

有女史二人

司珍典珍掌珍各二人掌珠珍錢貨

有女史六人

司綵典綵掌綵各二人掌錦綵縑帛絲帛有賜用則旬

別案記

有女史二人

司計典計掌計各二人給衣服飲食薪炭

有女史二人

宮正一人正五品司正二人正六品典正二人正七品

宮正掌戒令糾禁謫罰之事宮人不供職者司正以牒

取裁小事決罰大事奏聞

有女史四人阿
監副監視七品

太子內官良娣二人正三品良媛六人正四品承徽十
人正五品昭訓十六人正七品奉儀二十四人正九品
司閨二人從六品三司皆如之掌導引妃及宮人名簿

總掌正掌書掌筵

掌正三八從八品九掌皆如之掌文書出入管鑰糾察

推罰

有女史
三人

掌書三人掌符契經籍宣傳啓奏教學稟賜紙筆

有女
史三

人

掌筵三人掌幄帟牀褥几案輿織汎掃鋪設

司則二人掌禮儀參見總掌嚴掌縫掌藏

掌嚴三人掌首飾衣服巾櫛膏沐服玩仗衛

有女史
三人

掌縫三人掌裁紉織績

有女史
三人

掌藏三人掌財貨珠寶繡絲

司饌二人掌進食先嘗總掌食掌醫掌園

有女史四人

掌食三人掌膳羞酒醴燈燭薪炭器皿

有女史四人

掌醫三人掌方藥優樂

有女史二人

掌園三人掌種植蔬果

有女史二人

唐書卷四十七

唐書卷四十七考證

百官志二內侍省監二人從三品○舊書作正三品

唐書卷四十七考證

欽定四庫全書薈要卷五千一百八十

史部

唐書卷四十八

宋翰林學士歐陽修撰

志第三十八

百官志

御史臺大夫一人正三品中丞三人正四品下大夫掌以刑法典章糾正百官之罪惡中丞為之貳其屬有三院一曰臺院侍御史隸焉二曰殿院殿中侍御史隸焉

三曰察院監察御史隸焉凡寃而無告者三司詰之三
司謂御史大夫中書門下也大事奏裁小事專達凡有
彈劾御史以白大夫大事以方幅小事署名而已有制
覆囚則與刑部尚書平閱行幸乘輅車為導朝會則率
其屬正百官之班序遲明列於兩觀監察御史二人押
班侍御史顯舉不如法者文武官職事九品以上及二
王後朝朔望文官五品以上及兩省供奉官監察御史
員外郎太常博士日參號常參官武官三品以上三日

一朝號九參官五品以上及折衝當番者五日一朝號
六參官弘文崇文館國子監學生四時參凡諸王入朝
及以恩退至者日參九品以上自十月至二月袴褶以
朝五品以上有珂蕃官及四品非清官則否凡朝位以
官職事同者先爵爵同以齒致仕官居上職事與散官
勲官合班則文散官居職事之下武散官次之勲官又
次之官同者異姓為後親王嗣王任文武官者從其班
官卑者從王品郡王任三品以下職事者居同階品之

上非任文武官者嗣王居太子太保之下郡王次之國
公居三品之下郡公居從三品之下縣公居四品之下
侯居從四品之下伯居五品之下子居從五品之上男
居從五品之下以前官召見者居本品見任之上以理
解者居同品之下本司參集者以職事為上下文武三
品非職事官者朝參名簿皆稱曰諸公凡出不踰四面
關則不辭見都督刺史都護既辭候旨於側門左右僕
射侍中中書令初拜以表讓中書門下五品以上及諸

司長官謝於正衙復進狀謝於側門兩班三品以朔望

朝就食廊下殿中侍御史二人為使涖之高宗改治書侍御史中丞

以避帝名龍朔二年改御史臺曰憲臺大夫曰大司憲中丞曰司憲大夫武后文明元年改御史臺曰肅政臺

光宅元年分左右臺左臺知百司監軍旅右臺察州縣省風俗尋命左臺兼察州縣兩臺歲再發使八人春曰

風俗秋曰廉察以四十八條察州縣兩臺御史有假有檢校有員外有試至神龍初皆廢景雲三年以兩臺望

齊糾舉苛察百僚厭其煩乃廢右臺延和元年復置歲中以尚書省隸左臺月餘而右臺復廢至德後諸道使

府參佐皆以御史為之謂之外臺復有檢校裏行內供奉或兼或攝諸使下官亦如之會昌初升大夫中丞品

東都留臺有中丞一人侍御史一人殿中侍御史二人監察御史三人元和後不置中丞以侍御史殿中侍御

史監察御史主留臺務
而三院御史亦不常備

侍御史六人從六品下掌糾舉百寮及入閣承詔知推
彈雜事凡三司理事與給事中中書舍人更直朝堂若
三司所按而非其長官則與刑部郎中員外郎大理司
直評事往訊彈劾則大夫中丞押奏大事法冠朱衣纁
裳白紗中單小事常服久次者一人知雜事謂之雜端
殿中監察職掌進名遷改及令史考第臺內事顯決亦
號臺端次一人知公廨次一人知彈分京城諸司及諸

州為東西次一人知西推贓贖三司受事號副端次一人知東推理匭等有不糾舉者罰之以殿中侍御史第一人同知東推蒞太倉出納第一人同知西推蒞左藏出納號四推御史隻日臺院受事隻日殿院受事次侍御史一人分司東都臺凡御史以下遇長官於路去戴下馬長官斂轡止之出入行止殿中以下視以為法先後有罰入朝則與殿中侍御史隨仗分入東則居侍中黃門侍郎給事中之次西則居中書令侍郎舍人之次

各居中丞大夫下每一人東嚮承詔五日有旨召御史
不呼名則承詔者出樂彥璋為大夫以嘗召兩御史乃
加副承詔一人闕則殿中丞之監察御史分日直朝堂
入自側門非奏事不至殿庭正門無籍天授中詔側門
置籍得至殿庭開元七年又詔隨仗入閤分左右巡糾
察違失左巡知京城內右巡知京城外盡雍洛二州之
境月一代將晦即巡刑部大理東西徒坊金吾縣獄蒐
狩則監圍察斷絕失禽者其後以殿中掌左右巡尋以

務劇選用京畿縣尉又置御史裏行使侍御史裏行使
殿中裏行使監察裏行使以未為正官無員數唐法殿
中侍御史遷拜及職事與侍御史鈞開元以降權屬侍
御史而殿中兼知庫藏宮門內事故事御史臺不受訟
有訴可聞者略其姓名託以風聞其後御史嫉惡者少
通狀壅絕十四年乃定授事御史一人知其日劾狀題
告事人姓名其後宰相以御史權重建議彈奏先白中
丞大夫復通狀中書門下然後得奏自是御史之任輕

矣建中元年以侍御史分掌公廨推彈自是雜端之任

輕矣元和八年命四推御史受事周而復始罷東西分

日之限隋末廢殿內侍御史義寧元年丞相府置察吏掾二人武德元年改曰殿中侍御史龍朔元年

置監察御史裏行武后文明元年置殿中裏行後亦顯以裏行名官長安二年置內供奉

主簿一人從七品下掌印受事發辰覈臺務主公廨及

戶奴婢勲散官之職錄事二人從九品下有主事二人臺院有令史

七十八人書令史二十五人亭長六人掌固十一人殿院有令史八人書令史十八人察院有計史三十四人

令史十人掌固十二人

殿中侍御史九人從七品下掌殿庭供奉之儀京畿諸州兵皆隸焉正班列於閤門之外糾離班語不肅者元日冬至朝會則乘馬具服戴黑豸升殿巡幸則往來門旗之內檢校文物虧失者一人同知東推監太倉出納二人同知西推監左藏出納二人為廊下食使二人分知左右巡三人內供奉

監察御史十五人正八品下掌分察百寮巡按州縣獄訟軍戎祭祀營作太府出納皆莅焉知朝堂左右廂及

百司綱目凡十道巡按以判官二人為佐務繁則有支使其一察官人善惡其二察戶口流散籍帳隱沒賦役不均其三察農桑不勤倉庫減耗其四察妖猾盜賊不事生業為私蠹害其五察德行孝悌茂才異等藏器晦跡應時用者其六察黠吏豪宗兼并縱暴貧弱冤苦不能自申者凡戰伐大克獲則數俘馘審功賞然後奏之屯田鑄錢嶺南黔府選補亦視功過糾察決囚徒則與中書舍人金吾將軍莅之國忌齋則與殿中侍御史分

察寺觀蒞宴射習射及大祠中祠視不如儀者以聞初

開元中兼巡傳驛至二十五年以監察御史檢校兩京
館驛大厯十四年兩京以御史一人知館驛號館驛使
監察御史分察尚書省六司繇下第一人為始出使亦
然興元元年以第一人察吏部禮部兼監察使第二人
察兵部工部兼館驛使第三人察戶部刑部歲終議殿
最元和中以新人不出使無以觀能否乃命顯察尚書
省號曰六察官開元十九年以監察御史二人蒞太倉

左藏庫三院御史皆初領繁劇外府推事其後以殿中

侍御史上一人為監太倉使第二人為監左藏庫使凡

諸使下三院御史內供奉其班居正臺監察御史之上

太常寺卿一人正三品少卿二人正四品上掌禮樂郊

廟社稷之事總郊社太樂鼓吹太醫太卜廩犧諸祠廟

等署少卿為之貳凡大禮則贊引有司攝事則為亞獻

三公行園陵則為副大祭祀省牲器則謁者為之導小

祀及公卿嘉禮命謁者贊相凡巡幸出師克獲皆擇日

告太廟凡歲太享之器服有四院一曰天府院藏瑞應
及伐國所獲之寶禘祫則陳於廟庭二曰御衣院藏天
子祭服三曰樂縣院藏六樂之器四曰神厨院藏御廩
及諸器官奴婢初有衣冠署令正八品上貞觀元年署廢高宗即位改治禮郎曰奉禮郎以避
帝名龍朔二年改太常寺曰奉常寺九寺卿皆曰正卿少卿曰大夫武后光宅元年復改太常寺曰司常寺
丞二人從五品下掌判寺事凡享太廟則修七祀於西
門之內主事二人從七品上

博士四人從七品上掌辨五禮按王公三品以上功過

善惡為之諡大禮則贊御導引

大祝六人正九品上掌出納神主祭祀則跪讀祝文卿省牲則循牲告充牽以授太官

奉禮郎二人從九品上掌君臣版位以奉朝會祭祀之禮宗廟則設皇帝位於庭九廟子孫列焉昭穆異位去爵從齒凡樽彝勺冪篚玷簠簋登斝鬯豆皆辨其位凡祭祀朝會在位拜跪之節皆贊導之公卿巡行諸陵則主其威儀鼓吹而相其禮

協律郎二人正八品上掌和律呂錄事二人從九品上

八寺錄事品同

有禮院脩撰檢討官各一人府十一人史二十三人謁者十人贊引二十人贊

者四人祝史六人贊者十六人太常寺禮院禮生各三十五人亭長八人掌固十二人

兩京郊社署令各一人從七品下丞各一人從八品上

令掌五郊社稷明堂之位與奉禮郎設樽壘篚罌而太官令實之立燎壇積柴合朔有變則巡察四門以俟變

過明則罷

有府二人史四人典事五人掌固五人門僕八人齋郎百一十人齋郎掌供郊廟之役太

廟九室室有長三人以主樽壘篚罌鎖鑰又有壘洗二人郊壇有掌座二十四人以主神御之物皆禮部奏補

凡室長十年掌座十二年皆授官祭饗而員少兼取三館學生皆絳衣絳幘更一番者戶部下蠲符歲一申考諸署所擇者太常以十月申解於禮部如貢舉法帖論語及一大經中第者錄奏吏部注冬集散官否者番上如初六試而絀授散官唐初以郊社太樂鼓吹太醫太官左藏乘黃典廐典客上林太倉平準常平典牧左尚右尚為上署鈎盾右藏織染掌治為中署珍羞良醞掌醞守官武器車府司儀宗立導官甄官河渠弩坊甲坊舟楫太卜廩犧中校左校右校為下署

大樂署令二人從七品下丞一人從八品下樂正八人從九品下令掌調鐘律以供祭饗凡習樂立師以教而歲考其師之課業為三等以上禮部十年大校未成則

五年而校以番上下有故及不任供奉則輸資錢以充
伎衣樂器之用散樂閏月人出資錢百六十長上者復
繇役音聲人納資者歲錢二千博士教之功多者為上
第功少者為中第不勤者為下第禮部覆之十五年有
五上考七中考者授散官直本司年滿考少者不敘教
長上弟子四考難色二人次難色二人業成者進考得
難曲五十以上任供奉者為業成習難色大部伎三年
而成次部二年而成易色小部伎一年而成皆入等第

三為業成業成行修謹者為助教博士缺以次補之長

上及別教未得十曲給資三之一不成者隸鼓吹署習

大小橫吹難色四番而成易色三番而成不成者博士

有諫內教博士及弟子長教者給資錢而留之武德後

置內教坊於禁中武后如意元年改曰雲韶府以中官

為使開元二年又置內教坊於蓬萊宮側有音聲博士

第一曹博士第二曹博士京都置左右教坊掌俳優雜

技自是不隸太常以中官為教坊使

唐改太樂為樂正
有府三人史六人

典事八人掌固六人文武二舞郎一百四十人散樂二百八十二人仗內散樂一千人音聲人一萬二十七人
有別教院開成三年改法曲所處院曰仙韶院

鼓吹署令二人從七品下丞二人從八品下樂正四人
從九品下令掌鼓吹之節合朔有變則帥工人設五鼓
於太社執麾旒於四門之塾置龍牀有變則舉麾擊鼓
變復而止馬射設搗鼓金鈺施龍牀大儺帥鼓角以助
振子之唱
有府三人史六人典事四人掌固四人唐并清商鼓吹為一署增令一人

太醫署令二人從七品下丞二人醫監四人並從八品

下醫正八人從九品下令掌醫療之法其屬有四一曰

醫師二曰針師三曰按摩師四曰呪禁師皆教以博士

考試登用如國子監醫師醫正醫工療病書其全之多

少為考課歲給藥以防民疾凡陵寢廟皆儲以藥尚藥

太常醫各一人受之宮人患坊有藥庫監門葭出給醫

師醫監醫正番別一人葭坊凡課藥之州置採藥師一

人京師以良田為園庶人十六以上為藥園生業成者

為師凡藥辨其所出擇其良者進焉

有府二人史二人
主藥八人藥童二

十四人藥園師二人藥園生八人掌固四人醫師二十人醫工百人醫生四十人典藥一人針工三十人針生二十人按摩工五十六人按摩生十五人呪禁師二人呪禁工八人呪禁生十人

醫博士一人正八品上助教一人從九品上掌教授諸生以本草甲乙脉經分而為業一曰體療二曰瘡腫三曰少小四曰耳目口齒五曰角法

針博士一人從八品上助教一人針師十人並從九品下掌教針生以經脉孔穴教如醫生

按摩博士一人按摩師四人並從九品下掌教導引之

法以除疾損傷折跌者正之

呪禁博士一人從九品下掌教呪禁祓除為厲者齋戒以受焉

太卜署令一人從七品下丞二人從八品下卜正博士各二人從九品下掌卜筮之法一曰龜二曰五兆三曰易四曰式祭祀大事率卜正卜日示高於卿退而命龜既灼而占先上旬次中甸次下甸小祀小事者則卜正示高命龜作而太卜令佐蒞之季冬帥侂子堂贈大儼

天子六隊太子二隊方相氏右執戈左執楯而導之唱

十二神名以逐惡鬼儻者出磔雄雞於宮門城門

有卜助教

二人卜師二十人巫師十五人卜筮生四十五人府一人史二人掌固二人

廩犧署令一人從八品下丞二人正九品下掌犧牲案

盛之事祀用太牢者三牲加酒脯醢與太祝牽牲就榜

位御省牲則北面告膾以授太官籍田則供耒於司農

卿卿以授侍中籍田所收以供粢盛五齊三酒之用以

餘及稟飼犧牲

有府一人史二人典事二人掌固二人

汾祠署令一人從七品下丞一人從八品上掌享祭灑

掃之制

有府二人史四人廟幹一人開元二十一年置署

三皇五帝以前帝王三皇五帝周文王周武王漢高祖
兩京武成王廟令一人從六品下丞一人正八品下掌

開闔灑掃釋奠之禮

有錄事一人府二人史四人廟幹二人掌固四人門僕八人神龍二

年兩京置齊太公廟署其後廢開元十九年復置天寶
三載初置周文王廟署六載置三皇五帝廟署七載置
三皇五帝以前帝王廟署九載置周武王漢高祖廟署
上元元年改齊太公署為武成王廟署朱全忠曰武明
光祿寺卿一人從三品少卿二人從四品上丞二人從

六品上主簿一人從七品上掌酒醴膳羞之政總大官
珍羞良醞掌醢四署凡祭祀省牲鑊濯漑三公攝祭則
為終獻朝會享則節其等差錄事二人

龍朔二年改光祿寺曰司宰寺

武后光宅元年曰司膳寺有府十一人史二十二人亭長六人掌固六人

太官署令二人從七品下丞四人從八品下掌供祠宴
朝會膳食祭日令白卿詣厨省牲鑊取明水明火帥宰
人割牲取毛血實豆遂烹又實簋簠設於饌幕之內

有府

四人史八人監膳十人監膳史十人供膳二千四百人掌固四人

珍羞署令一人正八品下丞二人正九品下掌供祭祀

朝會賓客之庶羞榛栗脯脩魚鹽菱芡之名數

武后垂拱元年

改有藏署曰珍羞署神龍元年復舊開元元年又改有府三人史六人典書八人錫匠五人掌固四人

良醞署令二人正八品下丞二人正九品下掌供五齊

三酒享太廟則供鬱鬯以實六彝進御則供春暴秋清

醑醠桑落之酒

有府三人史六人監事二人掌醞二十人酒匠十三人奉解百二十人掌固四人

人

掌醢署令一人正八品下丞二人正九品下掌供醢醢

之物一曰鹿醢二曰兔醢三曰羊醢四曰魚醢宗廟用
菹醢以實豆賓客百官用醢醬以和羹

有府二人史二人
主醢十人醬匠二

十三人酢匠十二人豉匠十
二人菹醢匠八人掌固四人

衛尉寺卿一人從三品少卿二人從四品上丞二人從

六品上掌器械文物總武庫武器守宮三署兵器入者

皆籍其名數祭祀朝會則供羽儀節鉞金鼓帷幣茵席

凡供宮衛者歲再閱有敝則脩於少府主簿二人從七

品上錄事一人

龍朔二年改曰司衛寺武后光宅元年
又改有府六人史十一人亭長四人掌

固六
人

丞掌判寺事辨器械出納之數大事承制勅小事則聽
於尚書省

兩京武庫署令各二人從六品下丞各二人從八品下
掌藏兵械有赦建金雞置鼓宮城門之右大理及府縣
囚徒至則擊之監事各一人正九品上諸署監事品同
有府各六人史各六人典事各二人掌
固各五人開元二十五年東都亦置署

武器署令一人正八品下丞二人正九品下掌外戎器

祭祀巡幸則納於武庫給六品以上葬鹵簿祭戟凡戟
廟社宮殿之門二十有四東宮之門一十八一品之門
十六二品及京兆河南太原尹大都督大都護之門十
四三品及上都督中都督上都護上州之門十二下都
督下都護中州下州之門各十衣幡壞者五歲一易之
薨卒者既葬追還監事二人

有府二人史六人典事二
人掌固四人貞觀中東都

亦置
署

守官署令一人正八品下丞二人正九品下掌供帳帟

祭祀巡幸則設王公百官之位吏部兵部禮部試貢舉人則供帷幕王公婚禮亦供帳具京諸司長上官以品給其牀罽供蕃客帷帟則題歲月席壽三年氈壽五年禡壽七年不及期而壞有罰監事二人

有府二人史四人掌設六人幕

士八十人掌固四人

宗正寺卿一人從三品少卿二人從四品上丞二人從六品上掌天子族親屬籍以別昭穆領陵臺崇玄二署凡親有五等先定於司封一曰皇帝周親皇后父母視

三品二曰皇帝大功親小功尊屬太皇太后皇后皇太后皇
后周親視四品三曰皇帝小功親總麻尊屬太皇太后
皇太后皇后大功親視五品四曰皇帝總麻親袒免尊
屬太皇太后皇后皇太后小功親五曰皇帝袒免親太
皇太后小功卑屬皇太后皇后總麻親視六品皇帝親
之夫婦男女降本親二等餘親降三等尊屬進一等降
而過五等者不為親諸王大長公主長公主親本品嗣
王郡王非三等親者亦視五品駙馬都尉視諸親祭祀

冊命朝會陪位襲封者皆以簿書上司封主簿二人從

七品上知圖譜官一人修玉牒官一人知宗子表疏官

一人錄事二人

武德二年置宗師一人後省龍朔二年改宗正寺曰司宗寺武后光宅元年曰

司屬寺有府五人史五人亭長四人掌固四人京都太廟齋郎各一百三十人門僕各三十三人主簿錄事各

二人

諸陵臺令各一人從五品上丞各一人從七品下建初

啓運興寧永康陵令各一人從七品下丞各一人從八

品下掌守衛山陵凡陪葬以文武分左右子孫從父祖

者亦如之宮人陪葬則陵戶成墳諸陵四至有封禁民

葬唯故墳不毀

開元二十四年以宗廟所奉不可名以署太常少卿韋緇奏廢太廟署以少卿

一人知太廟事二十五年濮陽王徹為宗正卿恩遇甚厚建議以宗正司屬籍乃請以陵寢宗廟隸宗正天寶十二載駙馬都尉張垆為太常卿得幸又以太廟諸陵署隸太常十載改獻昭乾定橋五陵署為臺升令品永康興寧二陵稱署如故至德二年復以陵廟隸宗正永泰元年太常卿姜慶初覆奏以陵廟隸太常大曆二年復舊陵臺有錄事各一人府各二人史各四人主衣主輦主藥各四人典事各三人掌固各二人陵戶各三百人昭陵乾陵橋陵增百人諸陵有錄事各一人府各一人史各二人典事各二人掌固各二人陵戶各百人

諸太子廟令各一人從八品上丞各一人正九品下錄

事各一人令掌灑掃開闔之節四時享祭焉

有府各一人史各二

人典事各二人掌固各一人

諸太子陵令各一人從八品下丞各一人從九品下錄

事各一人

有府各一人史各二人典事各二人常固各一人陵戶各三十人太常舊有太廟署令一

人從七品下丞二人從七品下齋郎二十四人

宗玄署令一人正八品下丞一人正九品下掌京都諸

親名數與道士帳籍齋醮之事新羅日本僧入朝學問

九年不還者編諸籍道士女冠僧尼見天子必拜凡止

民家不過三夜出踰宿者立案連署不過七日路遠者
州縣給程天下觀一千六百八十七道士七百七十六
女冠九百八十八寺五千三百五十八僧七萬五千五
百二十四尼五萬五百七十六兩京度僧尼道士女冠
御史一人泣之每三歲州縣為籍一以留縣一以留州
僧尼一以上祠部道士女冠一以上宗正一以上司封

有府二人史三人典事六人掌固二人崇玄學博士一
人學生百人隋以署隸鴻臚又有道場玄壇唐置諸寺
觀監隸鴻臚寺每寺觀有監一人貞觀中廢寺觀監上
元二年置漆園監尋廢開元二十五年置崇玄學於玄

元皇帝廟天寶元年兩京置博士助教各一員學生百人每祠享以學生代齋郎二載改崇玄學曰崇賢館博士曰學士助教曰直學士置大學士一人以宰相為之領兩京玄元宮及道院改天下崇玄學為通道學博士曰道學博士未幾而罷寶應永泰間學生存者亡幾大厯三年復增至百人和天下僧尼道士女冠皆隸鴻臚寺武后延載元年以僧尼隸祠部開元二十四年道士女冠隸宗正寺天寶二載以道士隸司封貞元四年崇玄館罷大學士後復置左右街大功德使東都功德使修功德使總僧尼之籍及功役元和二年以道士女冠隸左右街功德使會昌二年以僧尼隸主客太清宮置玄元館亦有學士至六年廢而僧尼復隸兩街功德使

太僕寺卿一人從三品少卿二人從四品上丞四人從

六品上主簿二人從七品上錄事二人卿掌廐牧輦輿

之政總乘黃典廐典牧車府四署及諸監牧行幸供五
路屬車凡監牧籍帳歲受而會之上駕部以議考課永徽
中太僕寺曰司馭寺武后光宅元年改曰司僕寺有府
十七人史三十四人獸醫六百人獸醫博士四人學生
百人亭長四
人掌固六人

乘黃署令一人從七品下丞一人從八品下掌供車路
及馴馭之法凡有事前期四十日率駕士調習尚乘隨
路色供馬前期二十日調習於內侍省

有府一人史二人
駕士一百四

十人羊車小史十
四人掌固六人

典廩署令二人從七品下丞四人從八品下掌飼馬牛

給養雜畜良馬一丁中馬二丁駑馬三丁乳駒乳犢十

給一丁

有府四人史八人主乘六人典事八人執馭百人駕士八百人掌固六人

典牧署令三人正八品上丞六人從九品上掌諸牧雜

畜給納及酥酪脯腊之事羣牧所送羊犢以供廩犧尚

食監事八人

有府四人史八人典事十六人主酪七十四人駕士百六十人掌固四人

車府署令一人正八品下丞一人正九品下掌王公以

下車路及馴馭之法從官三品以上昏葬給駕士凡路

車之馬牛率馭士調習

有府一人史二人典書四人
馭士百七十五人掌固六人

諸牧監上牧監監各一人從五品下副監各二人正六
品下丞各二人正八品上主簿各一人正九品下中牧
監監正六品下副監從六品下丞從八品上主簿從九
品上下牧監監從六品下副監正七品下丞正九品上
主簿從九品下中牧監副監丞減上牧監一員南使西
使丞各三人從七品下錄事各一人從九品下北使鹽
州使丞各二人從七品下掌羣牧孳課凡馬五千為上

監三千為中監不及為下監馬牛之羣有牧長有尉馬之駕良皆著籍良馬稱左駕馬稱右每歲孟秋羣牧使以諸監之籍合為一以仲秋上於寺送細馬則有牽夫識馬小兒獸醫等凡馬游牝以三月駒犢在牧者三歲別羣孳生過分有賞死耗亦以率除之歲終監牧使巡

按以功過相除為考課

上牧監有錄事各一人府各三人史各六人典事各八人掌固

各四人中牧監減府一人史典事各減二人下牧監典事掌固減三人南使西使錄事史各一人府各五人史各九人北使鹽州使錄事以下員數及品如南使麟德中置八使分總監坊秦蘭原渭四州及河曲之地凡監

四十有八南使有監十五西使有監十六北使有監七
鹽州使有監八嵐州使有監二自京師西屬隴右有七
馬坊置隴右三使領之又沙苑樓頰天馬監沙苑監
掌畜隴右諸牧牛羊給宴祭及尚食所用每歲與典牧
署供馬自監以下品數如下
牧監至開元二十三年廢監

東宮九牧監丞二人正八品上錄事一人從九品下掌

牧養馬牛以供皇太子之用

有錄事史各一人府三人
史六人初監有監副監丞

主簿錄事各一人府二人史四人典事四人掌固二
人自監以下品同下牧監又有馬牧使有丞以下官

大理寺卿一人從三品少卿二人從五品下掌折獄詳

刑凡罪抵流死皆上刑部覆於中書門下繫者五日一

慮

龍朔二年改曰詳刑寺武后光宅元年改曰司刑寺中宗時廢獄丞有府二十八人史五十六人司直史

十二人評事史二十四人獄史六人

亭長四人掌固十八人問事百人

正二人從五品下掌議獄正科條凡丞斷罪不當則以法正之五品以上論者莅決巡幸則留總持寺事

丞六人從六品上掌分判寺事正刑之輕重徒以上囚則呼與家屬告罪問其服否

主簿三人從七品上掌印省署鈔目勾檢稽失凡官吏抵罪及雪免皆立簿私罪贖銅一斤公罪二斤皆為一

負十負為一殿每歲吏部兵部牒覆選人殿負錄報焉
獄丞二人從九品下掌率獄史知囚徒貴賤男女異獄
五品以上月一沐暑則置漿禁紙筆金刃錢物杵槌入
者因病給醫藥重者脫械鎖家人入侍

司直六人從六品上評事八人從八品下掌出使推按
凡承制推訊長吏當停務禁錮者請魚書以往錄事二
人

鴻臚寺卿一人從三品少卿二人從四品上丞一人從

六品上掌賓客及凶儀之事領典客司儀二署凡四夷

君長以蕃望高下為簿朝見辨其等位第三等居武官

三品之下第四等居五品之下第五等居六品之下有

官者居本班御史察食料二王後夷狄君長襲官爵者

辨嫡庶諸蕃封命則受冊而往海外諸蕃朝賀進貢使

有下從留其半於境繇海路朝者廣州擇首領一人左

右二人入朝所獻之物先上其數於鴻臚凡客還鴻臚

籍衣齎賜物多少以報主客給過所蕃客奏事具至日

月及所奏之宜方別為狀月一奏為簿以副藏鴻臚獻
馬則殿中太僕寺涖閱良者入殿中駑病入太僕獻藥
者鴻臚寺驗覆少府監定價之高下鷹鷂狗豹無估則
鴻臚定所報輕重凡獻物皆客執以見駝馬則陳於朝
堂不足進者州縣留之皇帝皇太子為五服親及大臣
發哀臨弔則卿贊相大臣一品葬以卿護二品以少卿
三品以丞皆司儀示以禮制主簿一人從七品上錄事
二人

龍朔二年改鴻臚寺曰同文寺武后光宅元年改曰司賓寺有府五人史十人亭長四人掌固六人

典客署令一人從七品下丞三人從八品下掌二王後
介公鄒公之版籍及四夷歸化在藩者朝賀宴享送迎
皆預焉首渠首領朝見者給稟食病則遣醫給湯藥喪
則給以所須還蕃賜物則佐其受領教拜謝之節

有典客十

三人府四人史
八人掌固二人

掌客十五人正九品上掌送迎蕃客額莅館舍

司儀署令一人正八品下丞一人正九品下掌凶禮喪

葬之具京官職事三品以上散官二品以上祖父母父

母喪職事散官五品以上都督刺史卒於京師及五品
死王事者將葬祭以少牢率齋郎執俎豆以往三品以
上贈以束帛黑一纁二一品加乘馬既引遣使贈於郭
門之外皆有束帛一品加璧五品以上葬給營墓夫

有司

儀六人府二人史二人掌設十八人
齋郎三十人掌固四人墓士六十人

司農寺卿一人從三品少卿二人從四品上掌倉儲委
積之事總上林太倉鈎盾導官四署及諸倉司竹諸湯
宮苑鹽池諸屯等監凡京都百司官吏祿稟朝會祭祀

所須皆供焉藉田則進耒耜

丞六人從六品上總判寺事凡祖及藁結至京都者閱而納焉官戶奴婢有技能者配諸司婦人入掖庭以類相偶行宮監牧及賜王公公主皆取之凡孳生雞彘以戶奴婢課養俘口則配輕使始至給稟食主簿二人從

七品上錄事二人

龍朔二年改司農寺曰司稼寺有府三十八人史七十六人計史三人亭

長九人掌固七人

上林署令二人從七品下丞四人從八品下掌苑園

池植果蔬以供朝會祭祀及尚食諸司常料季冬藏冰

千段先立春三日納之冰井以黑牡秬黍祭司寒仲春

啓冰亦如之監事十人

有府七人史十四人典事二十四人掌固五人

太倉署令三人從七品下丞五人從八品下監事八人

掌廩藏之事

有府十人史二十人典事二十四人掌固八人

鈞盾署令二人正八品上丞四人正九品上監事十人

掌供薪炭鵝鴨蒲葍陂池藪澤之物以給祭祀朝會饗

燕賓客

有府七人史十四人典事十九人掌固五人

導官署令二人正八品下丞四人正九品上監事十人

掌導擇米麥凡九穀皆隨精麤差其耗損而供焉有府八人

史十六人典事二十四人掌固五人初有御細倉督麩麩倉督貞觀中省

太原永豐龍門等倉每倉監一人正七品下丞二人從

八品上掌倉廩儲積凡出納帳籍歲終上寺有錄事一人府三人

史六人典事八人掌固六人龍門等倉減府一人史典事掌固各減二人

司竹監一人從六品下副監一人正七品下丞二人正

八品上掌植竹葦供宮中百司簾篚之屬歲以筍供尚

食

有錄事一人府二人史四人典事三十人掌固四人葺園匠一百人

慶善石門溫泉湯等監每監監一人從六品下丞一人
正七品下掌湯池宮禁防壇及待粟芻脩調度以備供
奉王公以下湯館視貴賤為差凡近湯所潤瓜蔬先時
而熟者以薦陵廟

有錄事一人府一人史二人掌固四人

京都諸宮苑總監監各一人從五品下副監各一人從
六品下丞各二人從七品下主簿各二人從九品上掌
苑內宮館園池禽魚果木凡官屬人畜出入皆有籍

有錄

事各二人府各八人史各十六人亭長各四人掌固各六人獸醫各五人

京都諸園苑監苑四面監監各一人從六品下副監各

一人從七品下丞各二人正八品下掌完葺苑面宮館

園池與種蒔蕃養六畜之事

顯慶二年改青城宮監曰東都苑北面監明德宮監

曰東都苑南面監洛陽宮農圃監曰東都苑東面監倉貨監曰東都苑西面監有錄事各一人府各三人史各

六人典事各六人掌固各六人

九成宮總監監一人從五品下副監一人從六品下丞

一人從七品下主簿一人從九品上掌脩完宮苑供進

鍊餌之事

有錄事一人府三人自監以下品同官
苑武德初改隋仁壽宮監曰九成宮監

諸鹽池監監一人正七品下掌鹽功簿帳

有錄事一人

諸屯監一人從七品下丞一人從八品下掌營種屯田

句會功課及畜產帳簿以水旱蝗蝗定課屯主勸率營

農督飲地課

有錄事一人府一人史二人典事二人掌
固四人每屯主一人屯副一人主簿二人

錄事一人府
三人史五人

太府寺卿一人從三品少卿二人從四品上掌財貨廩

藏貿易總京都四市左右藏常平七署凡四方貢賦百

官俸秩謹其出納賦物任土所出定精麤之差祭祀幣

帛皆供焉龍朔二年改太府寺曰外府寺武后光宅元年改曰司府寺中宗即位復曰太府寺有府

二十五人史五十人計史四人亭長七人掌固七人

丞四人從六品上掌判寺事凡元日冬至以方物陳於

庭者受而進之會賜及別勅六品以下賜者給於朝堂

以一人主左右藏署帳凡在署為簿在寺為帳三月一

報金部

主簿二人從七品上掌印省鈔目句檢稽失平權衡度

量歲以八月印署然後用之錄事二人

兩京諸市署令一人從六品上丞二人正八品上掌財

貨交易度量器物辨其真偽輕重市肆皆建標築土為
候禁權固及參市自殖者凡市日中擊鼓三百以會衆

日入前七刻擊鉦三百而散有果毅巡世平貨物為三
等之直十日為簿車駕行幸則立市於頓側互市有衛

士五十人以察非常

有錄事一人府三人史七
典事三人掌固一人

左藏署令三人從七品下丞五人從八品下監事八人

掌錢帛雜絲天下賦調御及御史監閱

有府九人史十二人典事十二人

人掌固八人

右藏署令二人正八品上丞三人正九品上監事四人

掌金玉珠寶銅鐵骨角齒毛絲畫

有府五人史十二人典事七人掌固十人

常平署令一人從七品上丞二人從八品下監事五人

掌平糴倉儲出納

有府四人史八人典事五人掌固六人顯慶三年置署武后時東都亦置

署

國子監祭酒一人從三品司業二人從四品下掌儒學

訓導之政總國子太學廣文四門律書算凡七學天子
視學皇太子齒胄則講義釋奠執經論議奏請京文武
七品以上觀禮凡授經以周易尚書周禮儀禮禮記毛詩
春秋左氏傳公羊傳穀梁傳各為一經兼習孝經論語
老子歲終考學官訓導多少為殿最

丞一人從六品下掌判監事每歲七學生業成與司業
祭酒蒞試登第者上於禮部

主簿一人從七品下掌印句督監事七學生不率教者

舉而免之錄事一人從九品下

武德初以國子監曰國子學隸太常寺貞觀二

年復曰監龍朔二年改國子監曰司成館祭酒曰大司成司業曰少司成咸亨元年復曰監垂拱元年改國子

監曰成均監有府七人史十

三人亭長六人掌固八人

國子監博士五人正五品上掌教三品以上及國公子

孫從二品以上曾孫為生者五分其經以為業周禮儀

禮禮記毛詩春秋左氏傳各六十人暇則習隸書國語

說文字林三倉爾雅每歲通兩經求仕者上於監秀才

進士亦如之學生以長幼為序習正業之外教吉凶二

禮公私有事則相儀

龍朔二年改博士曰宣業有大成
十人學生八十人典學四人廟幹

二人掌固四人東
都學生十五人

助教五人從六品上掌佐博士分經教授

直講四人掌佐博士助教以經術講授

五經博士各二人正五品上掌以其經之學教國子周
易尚書毛詩左氏春秋禮記為五經論語孝經爾雅不
立學官附中經而已

太學博士六人正六品上助教六人從七品上掌教五

品以上及郡縣公子孫從三品曾孫為生者五分其經

以為業每經百人

有學生七十人典學四人掌固六人東都學生十五人

廣文館博士四人助教二人掌領國子學生業進士者

有學生六十人東都十人天寶九載置廣文館有知進士助教後罷知進士之名

四門館博士六人正七品上助教六人從八品上直講

四人掌教七品以上侯伯子男子為生及庶人子為俊

士生者

有學生三百人典學四人掌固六人東都學生五十人

律學博士三人從八品下助教一人從九品下掌教八

品以下及庶人子為生者律令為額業兼習格式法例
隋律學隸大理寺博士八人武德初隸國子監尋廢貞
觀六年復置顯慶三年又廢以博士以下隸大理寺龍
朔二年復置有學生二十人典學
二人元和初東都置學生五人

書學博士二人從九品下助教一人掌教八品以下及

庶人子為生者石經說文字林為額業兼習餘書

武德初廢

書學貞觀二年復置顯慶三年又廢以博士以下隸秘
書省龍朔二年復有學生十人典學二人東都學生三
人

算學博士二人從九品下助教一人掌教八品以下及

庶人子為生者二分其經以為業九章海島孫子五曹
張丘建夏侯陽周髀五經算綴術緝古為顯業兼習記
遺三等數凡六學東脩之禮督課試舉皆如國子學助
教以下所掌亦如之

唐廢算學顯慶元年復置三年又
廢以博士以下隸太史局龍朔二

年復有學生十人典學
一人東都學生二人

少府監一人從三品少監二人從四品下掌百工技巧
之政總中尚左尚右尚織染掌冶五署及諸冶鑄錢互
市等監供天子器御后妃服飾及郊廟圭玉百官儀物

凡武庫袍襦皆識其輕重乃藏之冬至元日以給衛士
諸州市牛皮角以供用牧畜角筋腦革悉輸焉細鏤之
工教以四年車路樂器之工三年平漫刀稍之工二年
矢鏃竹漆屈柳之工半焉冠冕弁幘之工九月教作者
傳家技四季以令丞試之歲終以監試之皆物勒工名
丞六人從六品下掌判監事給五署所須金石齒革羽
毛竹木所入之物各以名數州土為籍工役衆寡難易
有等差而均其勞逸主簿二人從七品下錄事二人從

九品上

武德初廢監以諸署隸大府寺貞觀元年復置龍朔二年改曰內府監武后垂拱元年曰尚方

監有府二十七人史十七人計史三人亭長八人掌固六人短蕃匠五千二十九人綾錦坊巧兒三百六十五人內作使綾匠八十三人掖庭綾匠百五十人內作巧兒四十二人配京都諸司諸使雜匠百二十五人

中尚署令一人從七品下丞二人從八品下掌供郊祀

圭璧及天子器玩后妃服飾彫文錯綵之制凡金木齒

革羽毛任土以時而供赦日樹金雞於仗南竿長七丈

有雞高四尺黃金飾首銜絳繡長七尺丞以綵盤維以

絳繩將作監供焉擊柝鼓千聲集百官父老囚徒坊小

兒得雞首者官以錢購或取絳幡而已歲二月獻牙尺
寒食獻毬五月獻綬帶夏至獻雷車七月獻鈿針臘日
獻口脂唯筆琴瑟絃月獻金銀暨紙非旨不獻製魚袋
以給百官蕃客賜寶鈿帶魚袋則授鴻臚寺丞主簿監
作四人從九品下凡監作皆同品

有府九人史十八人
典事四人掌固四人

唐改內尚方署曰中尚方署武后改少府監曰尚方監
而中左右尚方織染方掌冶方五署皆去方以避監自
是不改矣有
金銀作坊院

左尚署令一人從七品下丞五人從八品下掌供翟扇

蓋繖五路五副七輦十二車及皇太后皇太子公主王

妃內外命婦王公之車路凡畫素刻鏤與宮中蠟炬雜

作皆領之監作六人

有府七人史二十人典事十八人掌固十四人

右尚署令二人從七品下丞四人從八品下掌供十二

閑馬之轡每歲取於京兆河南府加飾乃進凡五品三

部之帳刀劍斧鉞甲冑紙筆茵席履舄皆擬其用皮毛

之工亦領焉監作六人

有府七人史二十人典事十三人掌固十人

織染署令一人正八品上丞二人正九品上掌供冠冕

組綬及織紅色染錦羅紗縠綾綉絕絹布皆廣尺有八寸四丈為疋布五丈為端綿六兩為屯絲五兩為絢麻三斤為縠凡綾錦文織禁示於外高品一人專蒞之歲奏用度及所織每掖庭經錦則給酒羊七月七日祭杼

監作六人

有府六人史十四人典事十一人掌固五人

掌冶署令一人正八品上丞二人正九品上掌范鎔金銀銅鐵及塗飾琉璃玉作銅鐵人得採而官收以稅唯鑛官市邊州不置鐵冶器用所須皆官供凡諸冶成器

上數於少府監然後給之監作二人

有府六人史十二人典事二十三人

掌固

四人

諸冶監令各一人正七品下丞各一人從八品上掌鑄

兵農之器給軍士屯田居民唯興農治額供隴右監牧

監作四人

有錄事一人府一人史一人典事二人掌固四人太原治減監作二人

諸鑄錢監監各一人副監各二人丞各一人以所在都

督刺史判焉副監上佐丞以判司監事以參軍及縣尉

為之監事各一人

有錄事各一人府各三人史各四人典事各五人凡鑄錢有七監會昌中

增至公監每道置鑄錢坊一大中初三監廢

互市監每監監一人從六品下丞一人正八品下掌蕃

國交易之事

隋以監隸四方館唐隸少府貞觀六年改
交市曰互市監副監曰丞武后垂拱元年

曰通市監有錄事一人府二人
史四人價人四人掌固八人

將作監監二人從三品少監二人從四品下掌土木工
匠之政總左校右校中校甄官等署百工等監大明興
慶上陽宮中書門下六軍仗舍閑廡謂之內作郊廟城
門省寺臺監十六衛東宮王府諸廨謂之外作自十月

距二月休治功自冬至距九月休土功凡治宮廟太常擇日以聞

丞四人從六品下掌判監事凡外營繕大事則聽制勅小事則須省符功有長短役有輕重自四月距七月為長功二月三月八月九月為中功自十月距正月為短

功長上匠州率資錢以酬雇軍器則勒歲月與工姓名

武德初改令曰大匠少令曰少匠龍朔二年改將作監曰繕工監大匠曰大監少匠曰少監咸亨元年繕工監曰營繕監天寶十一載改大匠曰大監少匠曰少監有府十四人史二十八人計史三人亭長四人掌固六人

短蕃匠一萬二千七百四十
四人明資匠二百六十人

主簿二人從七品下掌官吏糧料俸食假使必由之諸
司供署監物有闕舉焉錄事二人從九品上

左校署令二人從八品下丞一人正九品下掌梓匠之
事樂縣篋簾兵械喪葬儀物皆供焉宮室之制自天子
至士庶有等差官脩者左校為之監作十人

有府六人
史十二人

監作十
二人

右校署令二人正八品下丞三人正九品下掌版築塗

泥丹堊區廁之事有所須則審其多少而市之監作十

人有府五人史十人
典事二十四人

中校署令一人從八品下丞三人正九品下掌供舟車

兵械雜器行幸陳設則供竿柱閑廡繫秣則供行槽禱

祀則供棘葛內外營作所須皆取焉監牧車牛有年支

芻豆則受之以給車坊監事四人武后時改曰營繕署
垂拱元年復舊尋廢

開元初復置有府二人史
六人典事八人掌固二人

甄官署令一人從八品下丞二人正九品下掌琢石陶

土之事供石磬人獸碑柱碾磴瓶缶之器勅葬則供明

器監作四人

有府五人史十人典事十八人

百工就谷庫谷斜谷太陰伊陽監監各一人正七品下
副監一人從七品下丞一人正八品上掌采伐材木監

作四人

武德初置百工監掌舟車及營造雜作有監少監各一人丞四人主簿一人又置就谷庫谷斜

谷太陰伊陽五監貞觀中廢百工監高宗置百工署掌東都土木瓦石之功開元十五年為監有錄事二人府一人史三人典事二十人

軍器監監一人正四品上丞一人正七品上掌繕甲弩

以時輸武庫總署二一曰弩坊二曰甲坊主簿一人正

八品下錄事一人從九品下

武德初有武器監一人正八品下掌兵仗廐牧少監

一人丞二人主簿一人七年廢軍器監八年復置九年又廢貞觀六年廢武器監開元以前軍器皆出左尚書三年置軍器監十一年復廢為甲弩坊隸少府十六年復為監有府八人史十二人亭長二人掌固四人

弩坊署令一人正八品下丞一人正九品下掌出納矛

箱弓矢排弩刃鏃雜作及工匠監作二人

有府二人史五人典事二

人貞觀六年改弓弩署為弩坊署甲鎧署為甲坊署

甲坊署令一人正八品下丞二人正九品下掌出納甲

胄綬繩筋角雜作及工匠監作二人

有府二人史五人典事二人

都水監使者二人正五品上掌川澤津梁渠堰陂池之政總河渠諸津監署凡漁捕有禁溉田自遠始先稻後陸渠長斗門長節其多少而均焉府縣以官督察

丞二人從七品上掌判監事凡京畿諸水因灌溉盜費者有禁水入內之餘則均王公百官

主簿一人從八品下掌運漕漁捕程會而糾舉之

武德初廢

都水監為署貞觀六年復為監改令曰使者龍朔二年改都水監曰司津監使者曰監武后垂拱元年改都水

監曰水衡監使者曰都尉開元二十五年不隸將作監有錄事一人府五人史十人亭長一人掌固四人初貞觀六年置舟楫署有令一人正八品下掌舟楫運漕漕正一人府三人史六人監漕一人漕史一人典事六人掌固八人上元二年置丞二人正九品

下掌運漕隱失開元二十六年置廢

河渠署令一人正八品下丞一人正九品上掌河渠陂池隄堰魚醢之事凡溝渠開塞漁捕時禁皆額之饗宗廟則供魚鮫祀昊天上帝有司攝事則供腥魚日供尚食及給中書門下歲供諸司及東宮之冬藏渭河三百里內漁釣者五坊捕治之供祠祀則自便橋至東渭橋

禁民漁三元日非供祠不採魚

唐有河隄使者貞觀初改曰河隄謁者有府三

人史六人典事三人每渠及斗門有長一人掌固三人魚師十三人初有監漕十人從九品上大厯後省興成五門六門龍首涇堰滋隄凡六堰皆有丞一人從九品下府一人史二人典事一人掌固二人貞觀六年皆廢

河隄謁者六人正八品下掌完隄堰利溝瀆漁捕之事

涇渭白渠以京兆少尹一人督視

諸津令各一人正九品上丞二人從九品下掌天下津

濟舟梁灞橋永濟橋以勲官散官一人莅之天津橋中

橋則以衛士拚掃凡舟渠之備皆先擬其半如塞竹篳

所在供焉

唐改津尉曰令有錄事一人府一人史二人典事三人津吏五人橋丁各三十人匠各八

人京兆河南諸津隸都水監便橋渭橋萬年三橋有丞一人從九品下府一人史七人典事二人掌固二人貞

觀中
廢

唐書卷四十八

唐書卷四十八考證

百官志三御史臺大夫一人正三品○舊書作從三品
監察御史十五人正八品下○舊書作正八品上

唐書卷四十八考證

謹案卷四十七第二頁前三行光宅元年改門下
省曰鸞臺刊本光宅訛垂拱據舊書及本書武
后紀唐六典通典改

第十四頁前三行四曰鵷鸞按舊書鸞作雛與此
異

第十七頁後七行內謁者監六人刊本六訛十據
唐六典會要及舊書改

卷四十八第十五頁前二行宗廟用菹醢以實豆

刊本脫醢字據唐六典增

第三十頁前二行奏請京文武七品以上觀禮刊
本脫請字據唐六典增



總校官庶吉士 臣 侍 朝

校對官編修 臣 周厚隸

謄錄監生 臣 陳廷瑜



財團法人 佛陀教育基金會 釋淨空 敬贈